

瓊山縣藝文志目錄

藝文志六賦

賦

颶風賦

宋蘇軾

南溟奇甸賦有序

明邱濬

問海賦

明魯彭

續山蠶繭賦有序

闕名

七詩

宋蘇軾

蘇軾

賦詩目錄

璞墩

明唐濂伯

塘尾甘泉員山八景之一

明尚書王宏誨

石嶺樵歌員山八景之一

王宏誨

雲林隱養

明錢福

憫黎詠六首

明錢鏞

學宮海棠十月放花

國朝關必登瓊山教諭

黎崗行

國朝李聘

讀大學衍義補

國朝符家麟



讀海忠介公治安疏

符家麟

玉龍泉二首 并序

國朝 邱對勤 大埔舉人

七古

真一酒歌

并序。酒以米麥水三者為之

宋 蘇軾

遊白石洞

宋 白玉蟾

南湘江觀海濤

明 瓊山李思迪 濟南人

雲林隨寓

為羅仲舉題

明 瓊山趙謙 餘姚人

海南村老歌

明 邢宥 文昌人

濁海歌

明 邱濬

璞墩

邱濬

輓貞節

為周宣妻莫氏題

邱濬

瓊山縣志 卷二十八

藝文詩目錄

二

午日卓明堂議修築北冲河口

明 海瑞

景賢祠

國朝 廣東學使 樊澤達 四川宜賓人

景賢祠

國朝 郡守 賈棠 直隸故城人

景賢祠

國朝 臨高令 樊庶 江南江都人

酌惠通泉讀東坡居士記

國朝 瓊山令 王贊 直隸新安人

五指山

國朝 學政 吳鴻 杭州人

咏烏嶺詩

國朝 張岳崧 定安人

讀邱文莊公遺集

符家麟

讀海忠介公遺集

符家麟

兵出洋

國朝 林桂

陶公山歌

國朝 符元禮

蘇公泉 國朝林瀛

藝文志八詩

五律

紫霞崗 朱蘇軾

瓊山 明邱濬

珠崖 明鍾芳

蒼屹山 明鄭廷鵠

雁塔三元峯 鄭廷鵠

石山 鄭廷鵠

東坡雙泉 鄭廷鵠

惠通泉 鄭廷鵠

瓊山縣志 卷二十八 藝文詩目錄

粟井浮金 國朝莊時著

蘇亭蘸翠 國朝李說

蘇亭蘸翠 國朝陳開春

浮粟泉即事 國朝府同知姚哲 湖廣黃陂人

小集觀稼亭 得稼字 國朝憲副王元樞 山東人

小集觀稼亭 得亭字 國朝謝寶

開河告成 國朝邱璣

遊真如寺二首 國朝符家麟

懷沙亭 符家麟

望闕亭 國朝符家龍

七律

庚辰歲人日作聞黃河已復故流老臣舊數論此  
今斯言乃驗

宋蘇軾

送春郊行

宋白玉蟾

養真

白玉蟾

東坡書院

元參政王仕熙

海南風景

明邢宥文昌人

瓊臺春曉

明邱濬

五指山

邱濬

海

邱濬

下田村

邱濬

瓊山縣志 卷二十八

藝文詩月錄

四

繡隱莊

明御史李珊

海天春曉

明檢討陳縝

響水橋

陳縝

留耕亭

為唐必大作

陳縝

東臯

為處士黃銓題

明李東陽茶陵人

六瑞堂

明謝譔

靈山登翠

明王愷

前題

明王增佑

景賢祠二首

明副使道王弘江南六合人

寓瓊臺

明鍾芳

珠崖雜興二首

鍾芳

顏盧崗

明史朝宜

環瓊海色

明郡守程瑩

雁塔薰風

明鄭廷鵠

海門秋月

鄭廷鵠

七星寒秀

鄭廷鵠

陶公福地

鄭廷鵠

玉龍泉

鄭廷鵠

文筆峯

明黃鏊

天威佑德

倭犯鍾司徒佳城雷迅遁去詩以紀之

明海瑞

樂耕亭

為邱郊題

海瑞

學士莊讌集

明胡榮

瓊山縣志卷二十八

藝文詩目錄

五

五指山和邱文莊韻

明王宏誨 定安人

拜邱文莊公

景賢祠

王宏誨

明昌塔

王宏誨

春日同許給諫諸文學登明昌塔絕頂

作海忠介公詩者誤

讀海忠介平黎章

王宏誨

海口渡

奉使南還

明許子偉

檳榔

國朝郡守牛天宿

美人蕉

牛天宿

荔枝

牛天宿

題瓊州

步邱文莊五指山韻

國朝張世燾

拜忠介祠

張世燾

浮粟泉

國朝總鎮 范時提 襄平人

景賢祠

國朝府同知 姚哲 湖廣黃陂人

景賢祠二首

國朝山令 王贊 直隸新安人

蘇亭蘸翠

國朝 陳咸

紅潮登頰醉檳榔

國朝 關必登 瓊山教諭

碧溪新漲

國朝 楊纘烈 大埔人

綠野香荷

楊纘烈

亭前酷月

楊纘烈

檻外寒秧

楊纘烈

初陽塔影

楊纘烈

百雉霞光

楊纘烈

瓊山縣志 卷二十八

藝文詩目錄

六

綠野香荷

國朝澄邁教諭 周炳 東莞人

瓊臺覽古三首

國朝學政 吳鴻

渡海二首

國朝庶吉士 饒慶捷 大埔人

瓊南懷古 八首 選四

國朝 方寰

讀海忠介公傳題後

國朝 巡撫 程含章

東坡祠

國朝 樂會 邱將瓚

讀瓊臺詩話懷清湘蔣文定先生 二首 符家麟

瓊臺懷古 六首 選四

國朝 王承烈

文筆峯

國朝 符顯銘

靈山登翠

國朝 曾日躋

補白沙口哀詩 有序

明 唐胄

哀使君

明王佐

哀四義士

王佐

哀百姓

唐胄

七絕

望闕亭

唐李德裕

天寧寺閣題花三首

朱李綱

馬鞍山

朱胡銓

曲肱三首

朱白玉蟾

瓊山出郭

元范惇

檳榔寨

范惇

馬鞍岡

明董其昌

瓊山縣志

卷二十八

藝文詩目錄

七

海南風景

明方向

雜詠

方向

天妃廟

明侍郎楊稽

前題

明副使項忠

相府咏梅

明檢討陳縝

乙岳真人

為辛仙周思仁題

明廣東巡撫談愷

颶風

國朝郡寺牛天宿

瓊山縣志卷之二十八

藝文志六 賦

颶風賦

宋蘇軾

仲秋之夕客有叩門指雲物而告予曰海氣甚惡非祲非祥斷霓飲海而北指赤雲夾日而南翔此颶之漸也予盍備之語未卒庭戶蕭然槁葉菽菽驚鳥疾呼怖獸辟易忽野馬之決驟矯退飛之六鷁襲土囊而暴露掠衆竅之叱吸予乃入屋而坐歛衽變色客曰未也此颶之先驅爾少焉排戶破牖頽瓦擗屋礮擊巨石揉拔喬木勢翻渤澥響振坤軸疑屏翳之赫怒執陽侯而將戮鼓千尺之清

瓊山縣志

卷二十八

藝文 賦

瀾翻百仞之陵谷吞泥沙於一卷落崩崖於再觸列萬馬而並驚潰千軍而爭逐虎豹讐駭鯨鯢犇蹙類鉅鹿之戰殷聲呼之動地似昆陽之役舉百萬於一覆予亦爲之股慄毛聳索氣側足夜拊榻而九徙晝命龜而三卜蓋三日而後息也父老來唁酒漿羅列勞來童僕懼定而說理草木之旣偃輯軒檻之已折補茅屋之罅漏塞牆垣之隕缺已而山林寂然海波不興動者自止鳴者自停湛天宇之蒼蒼流孤月之熒熒忽悟且嘆莫知所營嗚呼大小出於相形憂喜因於相遇昔之飄然者若爲巨耶吹萬不同果足怖耶蟻之緣也吹則墜蚋



之集也呵則舉夫噓呵曾不能以振物而施之二  
蟲則甚懼鵬水擊而三千搏扶搖而九萬彼視吾  
之惴慄亦爾汝之相莞均大塊之噫氣奚巨細之  
足辨陋耳目之不廣爲萬物之所變且夫萬象起  
滅衆怪懼眩求髣髴於過耳視空中之飛電則向  
之所謂可懼者實耶虛耶惜吾知之晚也

南溟奇甸賦

有序

明邱濬

伏讀太祖高皇帝勞海南衛指揮敕曰南溟之  
大中有奇甸數千里地居炎方多熱少寒是時  
瓊郡在炎天漲海之外帝卽視之以畿甸而褒  
之以奇之一言豈無意哉濬世家海南北學中

瓊山縣志

卷二十八

藝文賦

二

國偶有所見謹拜手稽首而賦之

爰有奇甸在南溟中邈輿圖之垂盡綿地脉以潛  
通山別起而爲崑崙水畢歸以爲溟渤氣以直達  
而專勢以不分而足萬山綿延茲其獨也百川瀾  
茫茲其谷也豈非員嶠瀛洲之別區神州赤縣之  
在異域者耶有一奇士全鍾其氣北學於中國頡  
頏乎天下之士於是叫閭闔呈琅玕翱翔乎玉堂  
徘徊乎道山肆言六合之外馳騁百氏之間自詫  
所生之奇勝敢爲高論恣爲大言翰林主人聞之  
駭而訝焉曰吁子來前子生寰區之外漲海之邊  
學何所受道何所傳何所從而至何所見而云然

試爲我一一言之吾將卽子之所云云者以紀載於簡編士曰唯唯乃作而言曰自夫天一生水融而爲川地十成土結而爲山川者天地之血脉山者天地之肌骨血脉流行於肌骨之中浹洽於中而外出出乎外而環其中是爲一大堪輿也具元氣之渾淪容日月之出沒然而大堪輿之外突起於浩淼之中而爲小堪輿者又不知凡幾窟穴也是故其大而顯者爲帝王之宇小而幽者爲神仙之邱帝王之宇是爲神州赤縣神仙之邱是爲員嶠瀛洲一則非骨蛻羽毛莫能到而非常理一則雖聲明文物之所萃而非真遊惟走所居之地介乎仙凡之間類乎島彝而不彝有如仙境而非仙以衣冠禮樂之俗居閭風元圃之壤勢盡而氣脉不斷域小而氣局斯全九州一大宇茲爲其輿四海一通川茲爲其竅上至北極僅十九度於天爲近遠至神京幾一萬里於地爲大茫茫巨浸兮與天爲界漠漠平川兮壯地之介豈非天造地設藏此奇勝於遼絕之域用以見天聽之孔卑表王化之無外耶其爲甸也可謂奇矣然奇而不怪焉翰林主人日子之言辯矣豈其然歟載考諸古茲地禹貢之所不載職方之所不書郡縣始漢武之世分野僅星紀之餘在漢七世固嘗棄之蓋不以之

爲有無也且甸者王畿之名非所以爲遐外之域  
奇者殊常之稱不可以加寂寞之墟子之言何所  
據而云乎士曰茲豈走之言哉於是乎惕然興竦  
然懼舉手加額北望向天百拜稽首而颺言曰此  
太祖聖神文武統天大孝高皇帝金口之所宣也  
大哉皇言乎自吾茲地而得茲言地若增而高物  
若加而妍山林草木濯濯然如在昆吾御宿之近  
封疆畛域整整然如與侯服邦畿以相連嗟夫地  
以人勝從昔皆然蘭渚以羲之而著天台以孫綽  
而傳夫以殘山剩水之勝一經騷人墨客之所賞  
詠尙揚芳於四外流美於當年矧茲奇甸環海以

瓊山縣志

卷二十八

藝文賦

四

爲疆者餘二千里縱步以行兮地雖甚遐仰首而  
觀兮天則伊邇一經大聖之品題山勢駸駸而內  
向波光躍躍而立起物則且然人可知已然則走  
所言者豈無所以耶主人乃仰焉而思俯焉而嘆  
曰良有以也願聞其所以士曰走也少而遊庠序  
壯而走四方雖生於是甸之中而甸之所以爲奇  
也容有所不能詳蓋嘗厯考夫禹益之所記緬想  
夫章亥之所步古往今來之宙上下四方之宇天  
左舒而起牽牛地右闢而起昴畢天有四維地有  
四極東至於泰遠西踰於頌國南訖於濮鉛北底  
於祝栗管子言名山三千墨氏云名川三百二百

之川總歸滙於東南三千之山皆發源於西北是則海者川之所委嶺者山之所積茲甸也居嶺海之盡處又越其崖而獨出別開絕島千里之疆總收中原百道之脈者也原夫天下之山皆自夫崑崙而來越戎而夏出險卽彝分爲兩界折爲三支其中一支經淮越江而極於衡霍遂散亂而分披至此而地勢將盡乃益險巖嶄巖巖嶄嶄嶄嶄嶄孰知一脈透出於瀛海之外其地可畫而井無以異於秦晉之近圻觀夫天下之川皆至於溟渤而止滔滔汨汨雖日趨於東然皆折於南西而後已大起而爲國都小起而爲洲坻其尾閭收萬水而瀦衆流遂浩漾而無涯涘自此而水勢益下弱莫能起濇瀉沉瀆渺沔灌漭孰知一島孤峙於瀛海之中其地可葦而航無以異於江湖之流水海可渡兮不踰百里山可登兮不踰尋丈舟之行也朝斯往而夕斯返人之遊也足可展而手可杖意其魄魄魄魄乃爾坦然彝曠意其汗汗汗汗乃爾悠然平漫蕞爾小方外之封疆宛然大域中之氣象陽明勝而氣之運也無息機土性殊而物之生也多奇相草經冬而不零花非春而亦放境臨乎極邊而復有海洩其苑氣而無瘴地四平以受敵無固可負歲三穫以常穰有積可仰通衢絕乞丐之

夫幽谷多耆老之丈古無戰場賦語信乎有徵地  
爲頗善符言斷乎非妄民生存古朴之風物產有  
瑰奇之狀其植物則郁乎其文采馥乎其芬馨陸  
橘水桂異類殊名其動物則彪炳而有文駟和而  
善鳴陸產川游詭象奇形凡夫天下之所常有者  
茲無不有而又有其所素無者於茲生焉歲有八  
蠶之繭田有數種之禾山富薯芋水廣鱸羸所生  
之品非一可食之物孔多兼華粵之所產備南北  
之所有木乃生水樹或出耐麴苞於椰荳莢於柳  
竹或肖人之面果或像人之手蟹出波兮凝石鱗  
橫港兮填阜小鳳集而色五並鸞遊而數偶修蝦

瓊山縣志

卷二十八

藝文

賦

六

而龍鬚文魚而鸚喙鱗登陸兮或變火鳩樹垂根  
兮乃攢金狗鼯綠樹杪而飛馬乘果下而走魚之  
皮可以容刀蚌之殼用以盛酒波底之砂行如郭  
索海滢之貝大如玉斗花梨靡刻而文烏櫛不涅  
而黝椰一物而十用其宜椰三合而四德可取木  
之精液藝之可通神明鳥之毳毛製之可飾容首  
有自然之器具有燦然之文繡天下皆有於菟茲  
獨無之豈天欲居民蕃息於此常夜戶不閉而無  
觸藩之虞乎江南皆無蚍蜉茲獨有之豈天欲寓  
公之久居於此使照壁見喜而無北風之思乎噫  
斯地也近隔雷廉僅一水耳而物之生也乃爾不

同遠去齊晉殆萬里兮而氣之通也胡爲無異若是者雖云生物之偶然安知造物者之無深意也然則茲甸之所以爲甸而奇之所以爲奇者庸有在於是主人曰然此物之奇爾如人何無乃奇之爲奇獨鍾於物而遺於人耶士曰不然天地盛大流行之氣始於北而行於南始也黃帝北都涿鹿中而堯舜漸南而都於河東其後成周之盛乃自豐鎬又南而宅於洛中蓋自北而漸南非獨天地之氣爲然而帝王之治亦循是以爲始終蓋水生天一而坎位於北而艮之爲山又介乎東北之間自北而東折歸於南其氣之所以融結而流行者

瓊山縣志

卷二十八

藝文

賦

七

非止乎一水一山山之餘而爲嶺水之委而爲海而是甸居乎嶺海之外收其散而一之透其餘而出之所以通其鬱而解其結其域最遠其勢最下其脈最細是以開闢以來天地盛大流行之氣獨後其至至遲而發也遲固其理也亦其勢焉是以三代以前茲地在荒服之外而爲駱越之域至於有漢之五葉始偕七郡而入於中國曼胡之纓未易也椎結卉服之風未革也持章甫而適之尙慳而未之識也魏晉以後中原多故衣冠之族或宦或商或遷或戍紛紛日來聚廬託處薰染過化歲異而月不同世變風移久假而客反爲主劇獷悍

以仁柔易介鱗而布縷今則禮義之俗日新矣絃誦之聲相聞矣衣冠禮樂彬彬然盛矣北仕於中國而與四方髦士相後先矣策名天府列跡縉紳其表表者蓋已冠冕佩玉立於天子殿陛之間行道以濟時而堯舜其君民矣孰云所謂奇者顯在物而不在人哉主人乃離席而立拱手而言曰神矣哉聖神之見乎其所謂奇者蓋至是乎驗矣士曰不然何地不生才而才生不擇地人才之生何地無之奇哉奇哉豈止是哉當我聖祖肇基之初輿圖際天地兵衛極邊鄙絲綸之音雲漢之章無日而不下無處而不至然而奇甸之言乃獨以專

瓊山縣志

卷二十八

藝文

賦

八

美茲地非甸而謂之甸未奇而預期以奇豈無意哉蓋帝王之言代乎上帝聖人之心通乎天地故能握乾符而妙奪神功闡坤珍而斡旋厚勢遠移而近書軌合以皆同質變以文聲教暨而靡異咫尺之間振舉乎萬里斯須之頃流通乎百世化庸腐以爲神奇變雜駭以爲精粹遐兮如邇來焉如既凡其所期兮罔或不遂引而弗替兮終萬古而如是則斯地之所以爲甸而甸之所以爲奇雖造設於天地然所以表而章之昭示於萬世者實本乎奉天啟運宰制山河之聖帝翰林主人聆茲言也輒然以哈憮然以喟曰秘矣哉天之藏此地也

遠矣哉聖人之期此地也自夫天開地闢以至今日不知凡幾運幾世矣自夫開疆闢土以建此區不知凡幾王幾帝矣然而多視之以窮荒或遂至於遐棄孰謂其今日有是哉不假詞臣之代言不出輔臣之建議今一旦無事發淵衷運睿慮形之於言以爲絲綸之製夫豈無所爲哉皇之言天之意也士言及此亦奇士哉於是三復士言而繼之以歌曰明明我聖祖兮載闢地而開天惟上帝眷顧兮付以其所覆之全仁周八表兮顧獨惓惓於窮海之一壘奇哉茲甸兮何幸得聖人題品之言千秋萬祀兮長炳炳琅琅乎天地之間

瓊山縣志卷二十八

藝文賦九

問海賦

明魯彭

余自辛亥春縮符茲土明年壬子秋九月乃遊於中珠之墟登臨博敷之坂東望溟海杳無涯際舉酒放歌倏然興懷作問海賦以自廣其詞

曰

惟聖王之誕土德兮求兆牧於寰寓辰極加於軫翼兮余始涖乎茲土大海薄而臨隍兮見地維之東坻溯浩渺而無涯兮際長空於叵測時殷殷以鳴窾兮或轟轟而若雷何爾聞而修答兮忽雷雨乎八荒豈造化之開先兮鼓大氣之茫茫天機動其橐籥兮將謂寂感而愈出亶洪鈞於斡旋兮司



地戶之闔闢喟神異之豈達兮命靈氛爲余卜曰  
造化之所秘兮扣筮茅而不告余引睇於扶桑兮  
旣瞥目乎沃焦羲和赫其臨御兮望舒服而飄飄  
遶四序之代謝兮寓消息於乘除潮汐貞而呼吸  
兮應朔望之盈虛時剡剡其明暎兮溘曖曖乎雲  
屯陰陽馳其不居兮奉行健於無言飛廉蕭而秋  
殺兮豐隆動而雲霓判寒暑於晨昏兮歛氣候之  
不齊天妃翳其遙臨兮渺雲衢之錯落何旻奕以  
揚靈兮倏上下之靡度紛總總其陸離兮班翺翔  
其委蛇鸞皇道而冉冉兮乘八龍以驅馳舳艫翩  
其揚帆兮續千艘曰烏白泛泱泱之一葉兮通炎

番於重譯惟王者之無外兮遂通道於蠻彝信中  
國之有聖兮適鳳凰之來儀昔神聖登於崑崙兮  
遊赤水而樂之謂元珠之可得兮令罔象而撥之  
揚燧晃而承日兮索方諸以迎月感跋鳥之揚精  
兮激顧兔之沮失藹春宮於葳蕤兮接沆瀣之精  
靈禮青皇以長跪兮爰假余以瑤瓊蓬萊望而咫  
尺兮儼瀛洲之可卽苟金光之余佩兮纏靈芝以  
爲食繫奇肱之飛車兮乘飈涼以西發駛鐵舟之  
汎汎兮指鯨波於吸忽龍伯舉而投竿兮繫汪洸  
之一絲何任公之旦旦兮制神魚於巨緇變桑田  
而三見兮忽人代之屢遷聽海屋之添籌兮又以

眷乎長年余朝登臨於裊海兮視波濤之崔巍蛟  
龍紛其騫騰兮龜鼉蠹而徘徊大鵬征於九萬兮  
頰鷄鷓之棲身奮精衛以銜石兮恨津梁之無期  
巨鼇突其冠山兮長鯨逝而凌波快奚有於同風  
兮鳴天雞於山阿龍宮做其縹緲兮蜃氣絢乎樓  
閣駢明珠與大貝兮見寶藏之惟錯欲燃犀以下  
照兮求地軸之所在燭龍銜光以先余兮吾惟質  
夫真宰信造化之神運兮簇萬彙其有生何乖常  
之不一兮欲嗽辭而難名余將發軔於暘谷兮聊  
憇足乎三山跡日月之所通兮襲氣母之循環大  
章躡塊而却步兮麾夸父而從之訊天吳以顛末

瓊山縣志

卷二十八

藝文

賦

十一

兮詔海客而詳之曰氣化之磅礴兮乃機緘之無  
盡藏也苟祲祥之有變兮或不得其常也余乃統  
會於神理兮齊萬物於芻狗渙晻靄於望洋兮得  
造化之樞紐昔余取樅於洞庭兮嗣乃泛乎彭蠡  
放震澤而南探兮何瀕洞而無涘既域中之巨浸  
兮謂余得乎大觀詢鴟夷之所如兮遵五湖而盤  
桓既周覽於四極兮獲流觀乎重渤藐衆水之難  
爲兮肆裂背而靡極洞寥廓於慘澹兮窀大塊其  
若浮槩大千以閱世兮付吾道於盟鷗羗學海之  
方蹄涔兮總百川而東之豁大度於汪洋兮寘包  
荒而中之辭曰大哉神乎天之高兮地之厚兮穴

大海而爲戶夫惟管樞乎闔闢兮形萬有於終古  
續山蠶繭賦有序

闕名

瓊稻再熟文蠶八登已爲宇內奇聞而更有莖  
蠶不食桑柘自生於根楮二木間民因取之以  
爲利明成化間野蠶作繭於黌宮對案文峯下  
先輩韓憲副以爲瑞而賦焉今則是處有之渤  
海生恐其後或且階厲也乃補其逸調以寓勸  
戒云

伊靈種之誕降兮稟天駟之星精與驂駟爲同氣  
兮尤生寶而發英丁軒皇之文運兮長受製於西  
陵皇王欽爲國華兮后妃躬親而視成浴澄川而

瓊山縣志

卷二十八

藝文

賦

十三

獻闕宮兮罄百室以夙興風戾桑之汲汲兮霜萑  
葦而營營胥人工之趨事兮孰神祐而錫朋昔炎  
漢之中興兮紀野蠶之自贏今祝融之司方兮覲  
山繭於自登爾其茂樹爲室兮長林作箔桑柘無  
須兮楮根饒嚼山靈呵護兮蚬蠟列燭毛女不侵  
兮花神佑作經雨露兮不冽慙風日而炎灼甫蠕  
蠕其綢繆兮俄累累而若若寒女唧唧於杼軸兮  
和蕭蕭乎綿絡獻之公子雖不絢乎朱黃布之編  
氓實可厠夫褐博惟聖人惡無故之利已不勞者  
不享其成而愚民席有造之遺惠不費焉取之無  
忤是蓋聖明投珠抵璧不貪難得而寶繚綸循良

製錦安絃不爲繭絲而爲衣被人感天而致和斯  
天假物而錫瑞也且見於文峯之下陳乎庠序之  
案是其應也將有飛鵝集泮冰紈火浣以承筐振  
鷺充廷華國黼黻以入獻者矣彼夫鳳羽磨角寒  
不可以爲帛靈芝瑤草饑不可以爲食卽如鮫綃  
貝錦徒艷其名曷若此之天寶物華允有厥實也  
迺作頌曰天無私覆徧九州兮獨茲海甸民有優  
兮椰爲酒樹天漿流兮枕爲食樹炬粒哀乎楛根  
衣樹繭絲綢兮昊天罔極恩難酬兮何以答天衆  
懷柔兮衣服在躬勉束脩兮職思其居良士休休  
兮重爲戒曰天之育民惟普利兮利之所叢害斯  
萃兮廣幅越布昔爲厲兮華綺萬藤女雉經兮金  
香賦愁波羅命傾兮上有所好下禍興兮錦繡千  
純君之所羸兮受大者不得取小慎毋與民爭兮

藝文志七詩

四古

洞酌亭 并序

朱蘇 賦

瓊山郡城衆泉虜發然皆冽而不食丁丑歲六月予南遷過瓊得雙泉之甘於城之東北隅以告其人自是汲者常滿泉相去咫尺而異味庚辰歲六月十七日遷於合浦復過之太守承議耶陸公求泉上之亭名與詩名之曰洞酌酌彼兩泉挹彼注茲一瓶之中有澗有溜以淪以烹衆喊莫齊自江徂海浩然無私豈弟君子江海是儀既味我泉亦濟我詩

瓊山縣志

卷二十八

藝文

詩

十四

和勸農六首 有序

蘇 賦

海南多荒田俗以質香爲業所產秔稌不足於食乃以藟芋雜米作粥糜以取飽余既哀之乃和淵明勸農詩以示其有知者

咨爾漢黎均是一民鄙夷不訓夫豈其真怨忿劫質尋戈相因欺謾莫訢曲自我人

天禍爾土不麥不稷民無用物怪珍是殖播厥薰水腐餘是穡貪夫污吏鷹鷲狼食

豈無良田廡廡平陸獸蹤交蹄鳥喙諧穆驚磨朝射猛豨夜逐芋羹藜糜飫飽耆宿

聽我苦言其福永久利爾鉏耜好爾鄰耦斬艾蓬

藿南東其畝父兄搢屐以扶游手  
天不假易亦不汝匱春無遺勤秋有厚糞雲舉雨  
決婦姑畢至我良孝愛祖惟何愧  
逸諺戲侮博奕頑鄙投之生黎俾勿冠履霜降稻  
實千箱一軌大作爾社一醉醇美

五古

和陶擬古九首 選六

蘇軾

少年好遠遊蕩志隘八荒九夷爲藩籬四海環我  
堂盧生與若士何足期杳茫稍喜海南州自古無  
戰場奇峯望黎母何異嵩與邛飛泉瀉萬仞舞鶴  
相低昂分沫未入海膏澤彌此方芋魁倘可飽無

瓊山縣志

卷二十八

藝文

詩

十五

肉亦奚傷

其四

馮洗古烈婦翁媪國于茲策勲梁武後開府隋文  
時三世更險易一心無磷緇錦傘平積亂犀渠破  
餘疑廟貌空復存碑版漫無辭我欲作銘誌慰此  
父老思遺民不可問僂句莫余欺犧牲菌雞卜我  
當一訪之銅鼓壺盧笙歌此迎送詩 其五

沈香作庭燎甲煎紛相和豈若注微火縈烟嫺清  
歌貪人無饑飽胡椒亦求多朱劉兩狂子隕墜如  
風花本欲竭澤漁奈此明年何 其六

雞窠養鶴髮及與唐人遊來孫亦垂白頗識李崖  
州再逢盧與丁閱世真東流斯人今在亡未遽掩

一邱我師吳季子守節到晚周一見春秋末渺焉  
不可求其七

城南有荒池瑣細誰復採幽姿小芙蓉香色獨未  
改欲爲中州信浩蕩絕雲海遙知玉井蓮落葉不  
相待攀躋及少壯已矣那容悔其八

黎山有幽子形稿神獨完負薪入城市笑我儒衣  
冠生不聞詩書豈知有孔顏儵然獨往來榮辱未  
異關日暮鳥獸散家在孤雲端問答子不通歎息  
指屢彈似言君貴人草莽棲龍鸞遺我吉貝布海

風今歲寒其九

海上作

宋 宋務光

瓊山縣志

卷二十九

藝文

詩

六

曠哉朝夕池大矣乾坤力浩浩去無際沉沉深不  
測崩騰歛衆流泱泱環中國鱗介錯殊品氛霞饒  
詭色天波渾莫分島樹遙相識漢王探靈怪秦皇  
恣游陟搜奇大壑東竦望成山北方術徒相誤蓬  
萊安可得吾君累仙道至化孚淳默驚浪接窮溟  
飛航通絕域馬人底厥貢龍伯修其職粵我邁休  
明匪躬期正旨敢輸鷹隼鷲以間豺狼忒海路行  
已殫輶軒未遑息勞君去日暮旅涕滄浪極魏闕  
渺雲端馳心負歸翼

璞墩

明 唐濂伯

城東一望許連簇水雲村巋然雙奇峯云是桐璞

墩璞乃玉田籍桐以琴故栽山輝知玉生桐茂木  
滋培築墩種桐玉陳均寓深趣匪爲縱游衍知德  
斯能喻比德以玉潤養心如種桐温密似仁智衰  
茂係勤慵積養已有餘玉見桐復茂當入大匠手  
將來謁君后南州文墨兒祁祁會如雲高調凌霄  
漢眼界空崑崙蔽列蒸民蒲般陳行葦臙醪聚寫  
素懷宛若天上客倚劍發浩歌爲謝桐璞墩伐桐  
作琴瑟玉烟輝乾坤我忝讀父書視君爲執友鳴  
珂金馬門他日同攜手

塘尾甘泉

具山八景之一

明尚書王宏誨

名泉出山下冷然甘且冽秋風落金梧寒泉飛玉

### 瓊山縣志

#### 卷二十八

藝文

詩

七

屑抱甕枯榦閑激流沉澹咽不用煮仙茗已解中  
心結

石嶺樵歌

具山八景之一

王宏誨

蜿蜒石礧間悠悠採樵者山鳥若相求牛羊忽來  
下折薪豈爲勞樂意聊舒寫聆彼太古音何事探  
風雅

雲林隱養

明錢福

海南有佳士枕海以爲廬海風吹行雲雲散林木  
疏雲散有時合木落不復初所以愛日心羲馭同  
馳驅豈不知富貴富貴浮雲如寧似林泉間春雨  
剪園蔬更將南溟水盡畜廬江魚五鼎直贅瘠晨



昏足庖廚愧殺王陵者助業何爲歟

憫黎詠 六首

明錢 嶸

在昔邃古初鴻濛闢天地絕谷嶂南海深箐鬱蒼  
翠中有黎母居伊人尙蒙昧鑿井以飲渴農田亦  
時藝荒路曖匪通幽巖或交市雖爾隔華界猶紀  
王正歲生黎若草木榮隕隨和厲熟黎若鳥獸儻  
俟無智慮所以古先聖馭之以不治

粵南本炎嶠矧此瓊崖東元冬日且和幽郊鮮陰  
風花柳蔭廣隰苗黍青芄芃皇仁漸南極草木均  
化工豈獨茲黎人物與非吾同軍行值人日感歎  
心忡忡

瓊山縣志 卷二十八

藝文

詩

六

朝發城東門夕駐藤江壘殺氣千層雲狼師渡藤  
水雞犬皆震驚人民盡奔徙海避愁蛟蛇山匿畏  
虎兇蛇毒猶可虞狼毒不可邇軍令甚分明顛仆  
何由弭伶俜泣路衢迸淚不能已嗟哉一將功豈  
獨萬骨毀

海南無猛虎而有麋與麋元崖產珍木種種稱絕  
竒斯物出異域頗爲中國推以茲重徵索奔頓令  
人疲窮年務采獵爲官共饋儀若云近歲盡無以  
充攜持直欲訴真宰鑿此蘇民脂物理有固然忉  
忉令人思

葉落當歸根雲沈久必起黎人多良田征歛苦倍

莛誅求盡餘粒尙豢犢與豕昨當租吏來宰割充  
盤几吏怒反索金黎民那有此泣向邏者借刻箭  
以爲誓貸一每輸百股削痛入髓生當剝肌肉死  
則長已矣薄訴吏轉嗔鎖縛不復視黎兒憤勇決  
挺身負戈矢倉急千人奔犯順非得已赫赫王章  
存令人棄如紙

朔風戒良節赫赫張皇師軍門號令嚴震肅將天  
威壯士快鞍馬鋒簇如星飛一舉破賊壘刀斧紛  
紛揮剖尸越邱阜踏血腥川坻白日暗西嶺瘴氣  
昏餘暉趨鼠隨我前饑鳥逐人歸征夫懷慘憂涕  
泗霑我衣黎人本同性云何發禍機神武貴勿殺

瓊山縣志

卷二十八

藝文

詩

十九

不在斬獲爲息火當息薪弭兵當弭饑誰生此厲  
階哲士知其非

學宮海棠十月放花

國朝關必登瓊山  
教諭

南國有嘉種托根桃李傍桃李榮朝秀棠花結素  
芳容顏若冰雪紅紫不同行云來自海上歲月鬱  
青蒼高標拂雲表蔭樾明倫堂物植得其地扶疎  
見輝煌旣發炎陽萼復吐小春香物故不可測天  
道安有常運會恒代謝榮悴疇能量迴顧三百年  
鸞鳳曾來翔元氣無終歇否極能泰昌觀茲層峻  
構廟貌正堂皇丹閣落成後靈物適相將繁花曜  
地軸冬翠映天光誰來挽頽運培養賴循良單父

鳴琴化先新夫子墻英才叨樂育械樸茂膠庠他  
日成楨幹護此作甘棠

黎崗行

國朝李聘

南方風土異終古無霜雪祝融常司令四序皆炎  
焚蠹爾崗中黎其性與人別上者爲巢居下者爲  
營窟歲晚不知年但視月圓缺家家養黎鬼遇事  
咸取決婚嫁無媒妁踏歌以相媾生計獵與漁茹  
毛還飲血胡然混沌風秉性逞雄傑同類日紛爭  
比戶成吳越刀箭必隨身榮辱在勇怯大崗連千  
家小崗遍坵垤野性如豺狼觸之卽肆齧時或擾  
邊陲撻伐寧盡滅余初尹茲土朝夕心切切入境

瓊山縣志

卷二十八

藝文

詩

二十

纔三日躬自履其穴家諭復戶曉悚聽生歡悅椎  
牛以犒之少長咸就列約法申三章俯首更吐舌  
從茲修職貢輸將果應節耕鑿安吠畎鷺戾轉馴  
帖年來盡格心覺隙罕萌蘖試觀鹿豕羣芻豢可  
維緘念此亦人類教化豈難浹莫以異類看動卽  
威鈇鉞思信以懷之藩籬不可撤

讀大學衍義補

國朝符家麟

宗聖傳遺經二百又五字綱舉目亦張無窮占教  
思其效終治平其功始格致至宋真西山乃更衍  
厥義節目及修齊其餘未編次類雖云可推義終  
嫌未備我瓊邱文莊經筵已久侍職思勤贊襄說

欲奏平治博稽古人言旁參一已意文成數十萬  
目分爲十二嘉言旣靡遺善行亦罔棄條看井井  
陳悉本西山例書成待十年地豈斯文墜真書主  
於理公書主於事理示以整躬事示以御世體立  
用斯行中閔外必肆煌煌大文章措施無不利何  
來蕪雜嫌反滋豎儒議甘泉文簡公亦欲繼公志  
作爲格物通自足驗多識何如公此書世可觀隆  
替士懷自靖心當資以明試坐言卽起行邦國徵  
經濟名居不朽三於公始無愧

讀海忠介公治安疏

符家麟

古來論諫諍厥義分爲五諷諫固應從懇諫亦可

瓊山縣志

卷二十八

藝文

詩

二十一

取惟上不負君學乃云有補有明當世宗道士來  
龍虎齋醮談薰修桃丸聽簧鼓楊爵甫上書身已  
幽囹圄羣臣咸結舌有言莫傾吐我公從內遷政  
方觀戶部伏闕陳治安力徵悟人主纒纒數千言  
言言切肺腑君軒旣名堯臣鼓故稱禹嘗觀古大  
臣進退非因旅作書仰阿衡補袞懷山甫豈徒好  
批鱗實本丹心苦我今讀公疏聲光溢毫楮利害  
不復知死生何足數終明三百年曾無茲諫輔稜  
稜秋日霜問誰堪繼武

玉龍泉 井序

國朝

邱對勤

大埔舉人

瓊城西十五里坡濬村之南石洞鉤連梯石突

入清波瀾瀾渟而池瀦而淵突而巖危而橋皆  
出人想外寺前石蓮花疊波面如雪幽香撲鼻  
榕陰憇而聽泉琤琤作琴筑聲不復知有人間  
世也同遊茂田愛亭彤卿弟億基侄與余共五  
人

黑雲排空來高下列成郭一綫度危關半飯露蘭  
若遠水鏡澄波倒影涵崖嶠小憇蝸廬陰力踏羊  
腸惡青秧延平疇濃樹寒野鶴龍神鑒余誠雪霰  
紛噴薄德施普人間布種農有託魚鳥皆忘機快  
暢天倫樂清茶流羽觴山花劇仙藥歸與敘游悰  
未厭詩瘦削

瓊山縣志

卷二十六

藝文

詩

三

其二

聞昔石無縫丁丁鬼斧鑿夜半觸泉脈風雷怒交  
作平地成重淵中有老龍躍龍去石旋合重淵化  
林薄憑空飛石龍雌雄狀宛若張口流清泉琴筑  
喧澗壑循聲尋水源龍首孰鐫削驟覩鱗之而山  
靈步遠卻我來正初春浥注歌洞酌隔牆聞笑語  
共說此中樂旁通芳徑幽咫尺到山脚清泉環古  
榕綠淨無處着忽然隨風散晴翠浦山郭迴波浮  
羽觴懸流挂珠箔禊事先期修裙屐影交錯戀此  
豈思返况復對雲鶴悵望出洞天徘徊度略約采  
采白頭翁土香聚仙藥回看山眉橫夕陽在村落

七古

真一酒歌

并序 酒以米  
麥水三者為之

宋蘇軾

布算以步五星不如仰觀之捷吹律以求中聲  
不如耳齊之審鉛汞以為藥策易以候火不如  
天造之真也是故神宅空樂出虛謁鞠者以氣  
升孰能推是類以求天造之藥乎於此有物其  
名曰真一遠遊先生方治此道不飲不食而飲  
此酒食此藥居此堂予亦竊其一二故作真一  
之歌其詞曰

空中細莖插天芒不生沮澤生陵岡涉閱四氣更  
六陽森然不受螟與蝗飛龍御月作秋涼蒼波改

瓊山縣志

卷二十八

藝文

詩

三

色屯雲黃天旋雷動玉塵香起搜十裂照坐光脚  
跌牛噍安且詳動搖天闕出瓊漿壬公飛空丁女  
藏三伏遇井了不嘗釀為真一和而莊三杯儼如  
侍君王湛然寂照非楚狂終身不入無功鄉  
余謫海南子由雷州被命即行了不相知至梧乃  
聞其尙在藤也旦夕當追及作此詩示之

九疑聯綿屬衡湘蒼梧獨在天一方孤城吹角咽  
樹裏落日未落江蒼茫幽人拊枕坐歎息我行忽  
至舜所藏江邊父老能說子白髮紅頰如君長莫  
嫌兄弟隔雲海聖恩尙許遥相望平生道學真寶  
意豈與窮達俱存亡天其以我為箕子要使此意

留要荒他年誰作輿地志海南萬里真吾鄉

遊白石洞

宋白玉蟾

昔年會上白石峯曉吸丹井舉芙蓉壇前星斗光  
燦燦凌空坐可摩飛鴻劉郎重到幽都觀東風不  
改桃花紅誰向陰崖結虛寶石鯨飲澗水龍涇流  
泉疊磴發天闕野蔓藜簞自蒙密忽然飛雨來半  
空不知林外猶殘日引身東望滄海田谷神洞口  
雲綿綿琅玕珊瑚遠莫致且鉏筭蕨烹春鮮此中  
佳趣不可傳我欲矯首問計然吳越興亡跡如掃  
山色依依青未了何年金鼎出空山雞犬餘丹能  
却老短衣射虎自有人共著青鞋拾瑶草

瓊山縣志

卷二十六

藝文

詩

二

南湘江觀海濤

明瓊山令李思迪

濟南人

海風捲水海欲黑翻天沃日高千尺馮夷起舞羣  
龍趨六鼇駕出雪山白洪流洶湧迷天闕我行見  
之心膽寒須臾滿耳自澎湃萬鼓怒吼雷門開水  
晶樓閣白玉闕千尋萬疊不可越有客破浪乘長  
風使我因之壯心發

雲林隨寓

爲羅仲舉題

明瓊山教諭趙謙

餘姚人

雲飄渺兮林蒼茫江湖濶兮山水長風月有時兮  
花木有香魚鳥可狎兮蔬筍可湘隨所寓兮樂康  
莊舟車所至兮於焉徜徉

海南村老歌

明邢宥

文昌人

海南村老非真村家能識字里能文讀書大意破  
孟論險彘巧拙知區分得錢只欲買書讀不置田  
廬與子孫祝融司天霜不殺四時雨露皆和溫禾  
取兩熟雜粳糯倉積種稔多如雲木奴大者十數  
種半花半實充林園族屬姻婭無遠邇歲時壺榼  
通溫存水行乘舟陸乘馬巾服雍容禮義敦况有  
僮僕可將命幸無徭役相勞頻采釣芳鮮隨意出  
海中爲樂難具論養高花下酒一樽無事足不躡  
公門心有餘寧形亦逸海南村老真非村

濁海歌

明邱濬

天下百川皆清漪一流入海便成緇茫茫不復辨

瓊山縣志

卷二十八

藝文

詩 二五

涇渭混混孰與論澗淄洪濤巨浪轟轟怒不覺已  
身如穢瓠思之何如山下泉清冽甘芳爲人慕我  
向潮頭三太息志欲澄清勢未及願言上帝檄天  
吳一夜黑波化成碧

璞墩

爲人海澄瑩三墩舊有石墩

邱濬

昔君築墩當近林種桐十載期製琴今君築墩向  
遠壑移石千山期得璞晨昏來往兩墩間功名富  
貴皆等閑有時哦詩石上坐有時拂軫桐陰彈鳳  
凰枝老秋蕭索却傍雲根事耕鑿琅玕箇箇拂雲  
長玉屑霏霏逐風落一溪流碧彎半璜泉聲琮瑤  
鳴珮瑤山含輝兮木含潤人言此地如崑岡瓊枝



琪樹羅階砌夜深疑有白虹氣藍田殮法曾試無  
北平種子應生未我家城西君城東梯雲石磴遙  
相通別來茫茫隔烟海置身遠在羣玉峯何時對  
子盧胡笑把酒同澆磊魄胸

輓貞節

爲周宣妻莫氏題

邱濬

員山周氏莫家女懿行雍容共稱許年方十九失  
所天獨守孀居誰晤語誦彼柏舟决矢懷爭與令  
女名同儕養親教子無時乖笑殺湖陽事不諧女  
丈夫兮執剛毅誰云匹配可奪志不向春光桃李  
醉直與歲後冰霜厲平生忠信任風波金貞烈烈  
照星河不亡者存自足多改容在世更如何我今

瓊山縣志

卷二十八

藝文

詩

三

援筆題斯卷特爲遊塵揮一扇四方千古流芳豔  
彼無惡兮此無厭

午日卓明堂議修築北冲河口

明海瑞

五指參天五嶽呈四州導水四山傾地脈不緣滄  
海斷中原垂盡覩全瓊特起崑崙浮浩瀆居然福  
地擬蓬瀛鴻荒世遠不可辨唐虞聲教朔南并郡  
縣開疆始秦漢輿圖一統歸皇明玉旨一從褒甸  
服珠崖千古表神京海濱絃誦追鄒魯天上夔龍  
翊治平鄉里衣冠今不乏登高望遠幾含情爰稽  
往牒紀圖讖大魁五解須彙征數過時考今則可  
後有作者誰先鳴北冲河口尙未塞女媧補煉須

經營裁成輔相固有道望景觀卜希前旌弱齡在  
萬今衰晚去來吾黨欣逢迎維時天中際佳節嚶  
鳴求友羅羣英蒲觴綵縷紛競勸玄談四座俱高  
聲就席探韻陳風雅稽首神天爲主盟卓明堂前  
一杯酒上帝肝鬢一壻羹肝膽鐫銘諧楚越市義  
好德垂休名從此山靈增氣色風雲際會符嘉禎  
五百名世應時出三千禮樂對縱橫政善民安歌  
道泰風調雨順號時清雍熙世擬華胥國蠻荒時  
築受降城逸史賡歌摘蘇句載稱奇絕冠平生

景賢祠

國朝廣東學使樊澤達  
四川宜賓人

皇帝四十六年夏奉

瓊山縣志

卷二十八

藝文

詩 二十七

命乘槎上瓊島祝融之國浮巨鰲五指中撐雲縹  
緲天下郡縣居海內獨此巋然立海表來施鐵網  
網珊瑚雌霓連捲復天矯探驪得珠汰魚目羣情  
輸服言靡譎撫今風氣忽懷古大有名賢遞開肇  
肅恭拜手景賢祠正氣羣猶塞蒼昊流風邈矣唐  
太尉朋黨相傾心悄悄一謫珠崖竟不還詩吟望  
闕空投老睂州兩公蘇與任後先安置鄰黎獠玉  
局窮無地可屋樓傍枕柳猶客鳥飲水只能甘乳  
泉可與言惟泰吉了文章觸諱如等閑平生道學  
寧草草公詩有平生道學  
真實意之句任公遠徙家亦傾謗書蜚  
幻餘羣小索居雖與髯翁同一遊酒人一枯槁彼

遊真如寺

國朝 符家麟

一徑圍疎竹中藏古寺深庭空花自落樓小月初  
臨掃地安禪席登壇辨梵音陶公如許醉社欲結  
東林

欲會真如妙全憑覺路通三生何待證四大本來  
空梅影高人共松心古佛同藉他清靜地洗我俗  
塵紅

懷沙亭

符家麟

雅愛汪提舉能將道義尊淵源分海國風月仰江  
門室遠人非遠言存道即存作亭依翠阜長覆小  
英村

瓊山縣志 卷二十八

藝文 詩 三

望闕亭

國朝 符家麟

莫以南行恨而忘北望枕作亭三徑闢對闕四愁  
侵碧海波光遠丹霄雲氣深何時歸鳳掖六事更  
陳箴

七律

庚辰歲人日作聞黃河已復故流老臣舊數論此

今斯言乃驗

宋 蘇軾

老去仍棲隔海村夢中時見作詩孫天涯已慣經  
人日歸路猶歡過鬼門三策還應思賈誼孤忠終  
未赦虞翻典衣剩買河源米屈指新芻作上元

送春郊行

朱白玉蟾

涇天盡頭在昔視爲煙瘴地名臣遷謫每多遊崇  
祠尸祝傳今古百代忠良同一土此身雖沒此名  
存歷歷高風猶可數有唐司戶李參軍高亭望闕  
不忘君宋室文忠蘇學士載酒開堂似子雲三朝  
辛苦憑忠定獨力支持誰與並任公同諫半年間  
百餘疏草邀誰聽胡公乞劍斬王倫趙相同時匡  
社稷或作生還海外人或作乘箕天上客更愛剛  
方李大參斥檜懷奸兼誤國重移昌化亦怡然攷  
史論文真自得郡內當年有賢相憂盛危明進忠  
讜衍義書成補治平卽今傳在西山上升沉榮辱  
固因時大節鴻名自天壤棖題重煥舊規模秋菊

瓊山縣志

卷二十八

藝文

詩

二十九

春蘭申肸蠁微言未足重羣公千秋萬世徒瞻仰

景賢祠

國朝臨江高令樊

庶  
江南江都人

唐宋中衰天未棄時危往往生名世隻手還支欲  
墜天瓊州遂作流賢地太尉殊勲潞澤聞六箴憂  
國更忠君羣邪在側中難駐氣散珠崖碧海雲大  
宋大蘇尤譎譎孤憤惟將文字托三謫何辜島上  
行獨立清風吹水國忠定巍巍將相材防秋主戰  
破時猜偉然十事傳青史豈惜投荒極瘴來德翁  
不媿官臺諫六月封章凡百見視捐七尺若鴻毛  
妻孥生死何能戀胡公請斬檜與倫一疏真懸日  
月新敵國千金求片藁儋崖萬里處孤臣太傅忠

誠天地知節如山岳世難移身騎箕尾歸何處盡  
古還留百粵悲參政廷爭不詭隨當時國是尙能  
爲一夫中朝和議決眼看宗社日傾危好是天將  
溟海重存亡不顧人哀痛往日甘心禦魑魅此時  
尊尙如麟鳳千載懷賢只賈公孤祠合食四時同  
復以文莊躋主席高卑欲使成雍容我來瞻拜情  
無極正氣如生生四壁諸賢作述半凋零獨喜天  
留海外集

酌惠通泉讀東坡居士記

國朝瓊王山令

贊直隸新安人

三山

菴名

距城五十里有菴流傳名不毀此菴未卜

昉何年中有井泉甘而旨東坡謫宦偶經過老僧

瓊山縣志卷二十八

藝文

詩

三

持餉聞香美泉遇高人始著名名爲惠通勒石紀  
惠水由來天下聞惠山遠隔如天際豈有脈脈一  
線通何爲溜澗分品第我來弔古獨追尋惟德禪  
宗今已逝一酌甘泉意洒然心脾浸浸疑蘭蕙摸  
索遺文感慨存屈指於今凡幾世

五指山

國朝學吳政

鴻杭州人

域中正祀尊五嶽海外乃有三神山山隨風去杳  
莫卽幾時得遇方壺圓嶠之飛仙瓊州望嶽幾千  
里我行但見蓬萊水何處乖龍罷戰來鱗甲滿天  
森五指巖業峻嶒次第排右環儋耳連珠崖橫空  
截斷南北路時見猿啼鶻沒霧黯而風霾趙佗老

稱制陸賈爲之權茲山崛強亦復爾兀立海外不  
與三百六十名山儕黎岐穴居不知數馴卽犁犢  
怒則爲狼豺憑依此山作窟宅老死不復施巾鞋  
傳聞此輩頗憚見官長一吏入室千夫猜紛紛藉  
藉餽酒肉再拜稽首同輿臺嗚呼山藪豈藏疾自  
織自耕還自食莽莽天低不盡雲蠢蠢人留太古  
色君不見銅柱威懸林邑中獨留此地未施功又  
不見海公慷慨上封事願闢山南大路通  
廟堂撫綏要有道一物熙育

皇慈同山兮山兮願汝壽同嵩華並泰岱亘千萬載屏

障南溟風

瓊山縣志

卷二十八

藝文

詩 三

咏烏嶺詩

國朝張岳崧 定安人

黑嶺巉巖參天黑百丈摩空壯劣削黑嶺山前有  
居人高擎遠勢倚挺特何人大筆飛淋漓撐起遠  
潑山頭墨榛莽千古無品題庶幾雄詞壯山色

讀邱文莊公遺集

符家麟

文能捍道文不刊矧經爲菹史爲瀾我求典型得  
公集字如菽粟真堪餐公少孤貧志耽學壯卽鳳  
池飛羽翰讀書中秘數十載諸子百家勤研鑽西  
山衍義待公補經國大業同周官文章特以綸閣  
重觸目累牘森琅玕險詞怪語痛斥盡惟存真樸  
歸毫端有時卓立如壘壁有時跳脫如星丸春容

渾厚居大雅宜其氣足其神完言雖在邇旨彌遠  
句不待宅章偏安含毫風雨向天至落紙蛟螭隨  
手蟠議論上下窺千古直從歐曾追柳韓所爲之  
文滿天下便嬖近倖無容干公之氣概本如此千  
秋豈被人譏彈當時雅尙臺閣體樸斲未畢先塗  
丹茶陵以前大紳後翕然效步如邯鄲公文獨勝  
以曉暢不與諸家同例看遺編至今可覆按洵堪  
高視雄文壇我嘗博觀名臣錄名姓在在同旃檀  
理學如公信不易著述如公良復難文詞詩古特  
餘事洋洋亦壯人瞻觀聞風雖言屬後起馥堪丐  
賸膏沾殘安得子厚薔薇露盥讀流芳餘肺肝邱

瓊山縣志

卷二十六

藝文

詩

三

陵學山不可至掩卷何禁喟然歎

讀海忠介公遺集

符家麟

天地正氣來崆峒蜿蜒直到滄溟中羣峯磅礴波  
奔洪挺然鍾此魚頭公立朝蹇蹇占匪躬能令臺  
閣揚清風文如其人真氣充崛強不與諸家同醜  
詆鄉愿由本衷欲障百川而使東但求闡道非求  
工圭角何必誇磨礪有如寶劍雖埋豐精潔不受  
塵埃蒙又如駿馬忽騰空欲施銜勒難爲功英詞  
偉論光熊熊一喝直振千秋聾披讀再三氣彌雄  
想見勁節摩蒼穹堪嗤人世談雕蟲剪紅刻翠調  
羽宮烏能百態兼牢籠寸心耿耿形孤忠

兵出洋

國朝林桂

三月初旬兵出洋白日晝晦風飛揚一鼓作氣遇  
賊驟爭先引却波低昂其時二船故不戰誘入深  
處島中央前者後者環如堵矢石如飛賊勢強殘  
喘弱兵膽已落參府錢公力獨當一手捩柁一手  
戰殺三四賊如屠羊賊欺勢孤勇益奮逞兇向公  
中一鎗挺身猶自立不動揮刀斫賊多殺傷賊跳  
過船頭隨墮紅浪如山血汪洋賊衆復斷公一手  
事已難濟天無光碎剝肉泥投海水魚龍感憤首  
騰驤大號官船袖手看紛紛兵弁唯徬徨吁嗟乎  
嘯聚羣醜逞雄武兵卒怯弱官周章人各異心保

瓊山縣志

卷二十八

藝文

詩

三

首領怖死出海如閨房君不見香山彭明府文官  
赤手搏虎狼生擒巨盜以百數渠魁纍纍繫成行  
當日瓊海能有此賊勢消退歸何方吾儕受賜應  
無疆

陶公山歌

國朝符元禮

吾聞天下福地七十二陶公山居二十四數峯突  
兀清且奇蒼蒼莽莽生特異天生奇甸鎮炎州丹  
崖赤壁誰與儔形勢縹緲多變態宛似海上神山  
之瀛洲吁嗟乎我家舊是居瓊島恣情泉石烟霞  
老平生乘興覽名山他山不如此山好可惜瓊地  
處偏涯少有高人拄杖與着鞋縱然挾雲摧雨千



萬狀未載史策不關懷自昔依依愛林麓領略陶  
山真面目近山遊山遂詠山俯愧古人才十斛草  
木盤屈石庚庚從來天地不虛生觸境高歌還落  
筆庶幾千古留其名幸矣哉陶公之山庶幾千古  
留其名

蘇公泉

國朝林 瀛

一泉清噴寒如玉一泉清冽每浮粟云是蘇公生  
回開至今井螿薛猶綠無論大者淪小者瀾盈盈  
汲者盈欄杆惠通之泉可洞溯洞酌之亭可盤桓  
我願味公泉兼欲嘖公詩詩中之意如澗溜豈是  
當年果有刺地法抑緣海脈滄溟爲從知所號蘇  
海才已驚浪雪濤奔雷收拾山川錦囊住涓茲浦  
澤留瓊臺爲問石泉槐火還如昨識否源頭從處  
來

瓊山縣志

卷二十八

藝文

詩

三十四

藝文志八 詩

五律

紫霞崗

宋蘇軾

仙人乘鶴去空崗獨巍然發草山山綠題痕日日鮮  
兩巖門未掩七里事何玄欲問希彝子楓林隔紫煙

瓊山

明邱濬

環海三千里珠崖第一山名馳四海內秀出萬峯間  
月下森瑤簡風前振珮環孤高尤潤澤蠟屐未容攀

珠崖

明鍾芳

瓊山縣志 卷二十八

藝文八

詩 三五

前代珠崖郡於今少竄臣山橫天有障地盡海無垠  
異種三生穀殊言五等人淳風傳古昔力作自相親

蒼屹山

明鄭廷鵠

玉龍出盤谷翹首對新城水帶環橋綠風舸觸石鳴  
迴翔本無意屈曲尙多情鳥跡留山識誰人識姓名

雁塔三元峯

鄭廷鵠

孤峯浮水外對面送青來石色蒸霞出湖光映日開  
人當韋肇榜名寄粵王臺危亭碑尙在歷歷見羣才

石山

鄭廷鵠

馬嶺開屏嶂峻嶒出萬山石田薄雲際丹竈在人  
寰白玉飛仙去金牛何日還清風巖下樹空對鳥  
關關

東坡雙泉

鄭廷鵠

東坡留勝跡故老識雙泉洞酌常如舊澗溜各自  
妍參公應是主牧守正須賢興復何年事長歌豈  
弟篇

惠通泉

鄭廷鵠

誰料三山下浮珠有惠泉洗盃如作梵卓錫自忘  
禪地是神仙境名因衲子傳追言昊天觀罷驛是

瓊山縣志

卷二十八

藝文

詩

三六

何年

粟井浮金

國朝 莊時著

一粟留孤島泉深水作苗龍津疏沃野仙種落晴  
霄粒湧光搖壁香分色在瓢到來餐白雪千載寄  
空寥

蘇亭蘸翠

國朝 李說

迴崖幔小築落落濺漣漪朗入青千樹虛涵碧一  
池疎楹穿粟眼冷檻露山眉指顧苔邊石坡公醉  
醒時

蘇亭蘸翠

國朝 陳開春

詩酒南來日人文宋代開孤亭聯碧影古篆印蒼

苔醉破煙波月寒穿曉嶂梅流風千古在光注紫

雲胎

浮粟泉卽事

國朝府同知姚哲  
湖南黃陂人

珠崖詎可棄砥柱海中流霧捲峯峯見泉清粒粒

浮眉山春夢杳交趾據鞍游祇在良臣翊寧煩

聖主憂

小集觀稼亭

得稼字

國朝憲副王元樞  
山東人

蘇子已千秋高蹤誰可亞空亭帶粟泉臞坐同僧

舍花媚自于邱山清原向謝

張子容詩江山清謝眺花柳媚邱遲

當學老農悃悃詢耕稼

小集觀稼亭

得亭字

國朝謝寶

瓊山縣志 卷二十八

藝文 詩 三七

浮粟留名勝芳遊我慣經頭憐新月白眼對舊山

青多稼分千畝雙泉共一亭遙思春夢客把酒話

滄溟

小集觀稼亭

得觀字

國朝邱璣

坡公會覽勝我輩一臨觀泉潤禾皆秀秋高地不

寒巖城如雉化曲徑亦龍蟠日暮仍呼酒分詩有

剩歡

開河告成

邱璣

欲展擎天手先收治地功千家艱轉運兩憲力疏

通

潘公思榘王公元樞

城瞰溪心月山回水面風文瀾應活

潑滴滴自茲東

此一斤三年淹去住同揆詎遲早名臣輩出宋南  
渡捧日精忠忠簡趙九死餘生倔強詞能令奸雄  
魄俱薨自書墓石自銘旌後來繼者胡公好趙公  
舊寓胡公居掃塵昔夢符先兆傳經黎首尙知化  
誤國臣寧不心澡昔有邵武後上虞長庚毓質光  
皎皎莊簡居瓊八年久唱和胡公相傾倒疊與仲  
子俱被誣履險如屐終壽考邵武遭際宣和年防  
秋之議南仲撓彼譖人兮黃與汪復沮高宗容直  
道吁嗟宋室不復振數公前後流荒徼地以人傳  
萬古名白唐迄宋人綿邈或排和議或黨禍骨鯁  
孤忠冰雪皦文莊挺生明盛時瓊山毓秀敷文藻

瓊山縣志

卷二十八

藝文

詩

二十六

衍義補與史正綱帝統儒術常且曉原始景賢祠  
祀蘇文莊配合馨香繞歲久枕風椰雨摧一望荒  
煙叢篁篠五馬向年來賈山望古躊躇思渺渺  
材舊址擴祠宇增祀羣賢見懷抱尙有闕者闕忠  
介文章政事日杲杲先後文莊作地主景賢增祀  
安可少數公名節炳日月墮地人當思所紹祠下  
徘徊不能去瓣香再拜酬清醮題詩勒石回使旌  
勝取支機河浩淼

景賢祠

國朝郡

守賈

棠

直隸故城人

哲人之生天所置時地不齊心豈異總是忠君愛  
國情頓令後起生遐思我來出守粵南州大海之

怨風怨雨總皆非  
風雨不來春亦歸  
越鳥啼殘花影瘦  
吳蠶眠老柘陰稀  
枝頭紅綻梅初熟  
口角黃乾燕學飛  
我亦欲歸歸未得  
擔頭猶掛一蓑衣

養真

白玉蟾

道人不作槐根夢  
一片虛頑太古心  
無雪可摧桑柘老  
有家原住白雲深  
山頭日落虎長嘯  
海面風生龍自吟  
世上幾人能了此  
野花啼鳥却知音

東坡書院

元參政王仕熙

元祐先生玉署仙  
海南遺跡有雙泉  
古城雲鎖荒祠月  
高樹風吹野水煙  
酌酒浮杯空九曲  
斷碑懷古又千年  
醉醒誰唱滄浪曲  
興在山城縹緲邊

瓊山縣志

卷二十六

藝文

詩

三九

海南風景

明邢宥  
文昌

南荒千里盡王疆  
四顧天連海色蒼  
二郡輿圖興自漢  
五州編戶盛於唐  
故家大半來中土  
厚產偏多起外莊  
絃誦聲繁民物庶  
宦遊都道小蘇杭  
德星南斗聚光華  
文物衣冠聳故家  
魚兔迭班唐使節  
樓臺相望漢官衙  
表封戶等侯封富  
宦況時兼野況嘉  
處處絃歌聞未歇  
瓊州誰道是天涯

瓊臺春曉

明邱濬

縹緲波濤四望中  
春光曉色迥相同  
雲開若木天頭白  
水擊扶桑日脚紅  
海島三千餘里地  
花朝二十四番風  
陽春有脚行初到  
和氣融融滿太空

五指山

邱濬

五峯如指翠相連撐起炎州半壁天夜盪銀河摘  
星斗朝探碧落弄雲煙雨餘玉笋空中現月出明  
珠掌上懸豈是巨靈伸一臂遙從海外數中原

海

邱濬

乾坤巨浸海茫茫萬斛樓船百尺檣雲脚四垂天  
作界浪頭雙捲水分洋

大海中心兩際浪頭相撞擊而還分開爲一路號日

分水夜深寶氣騰光焰歲久龍齋結古香今日大

觀歸老眼應須一口吸江湖

下田村

邱濬

瀛海之中別有天寧知我不是神仙請言六合空

瓊山縣志

卷二十八

藝文

詩

四

虛外曾見三皇混沌前元圃麟洲非遠境延康龍  
漢未多年有人問我家居處朱橘金花滿下田

繡隱莊

明御李珊

茅簷煙火數家村且樂天年付子孫卧看白雲生  
遠岫任教芳草長閑門清陰石上寒侵枕流水臺  
前月滿樽忽喜故人

學士陸簡

書信到高風謂我有誰

倫

海天春曉

明檢陳縻

天地春回大海中韶華不與異鄉同林椰葉老無  
窮碧海漆花嬌別漾紅鐘鼓響低千瘴月客船牽  
動五更風平明縱步瓊臺看描畫丹青四面通

響水橋

陳 鱗

響水橋頭響水橋蒼龍高卧白雲霄半灘湧激驪  
珠碎幾曲潺湲鳳律調周道南來平似砥餘波東  
下直通潮登臨漫把相如筆此去昇仙竟不遙

留耕亭

爲唐必大作

陳 鱗

留耕亭下好溪山頃頃都歸方寸間穀種但施平  
坦地町畦不用巧機關雨暘自有天公管穫歛從  
知人事難最是子孫長久計食時須記劊時難

東臯

爲處士黃銓題

明 李東陽

日日沙頭看鳥飛柴門剛枕釣漁磯鶴鳴驚見海  
穿月客嘯不知風滿衣鄰舍墻邊呼酒近故人天

瓊山縣志

卷二十八

藝文

詩

十一

上寄書稀從今小隱須彌大新向長安市上歸

六瑞堂

明 謝 謨

循良天惠海邊頭波浪澄清宿霧收纔把一麾來  
北闕便驚六瑞列南州日高雙影亭亭炫風動孤  
香冉冉浮好作畫圖當宁獻御屏風上永傳休

靈山疊翠

明 王 愷

名山高處有仙厓山秀鍾靈景更奇澗小竹深流  
水細林幽風轉落花遲眼觀宮闕五雲近心動鄉  
關萬里思身在天涯同是客不妨遊衍醉金卮

前題

明 王增佑

靈祠形勝俯山河載酒遊來發浩歌林下坐聽啼



鳥緩風前吟對落花多碑橫古逕生苔蘚樹老空  
庭長薜蘿歸向江頭還喚渡一篙明月泛清波

景賢祠

明副王 弘  
使道 江南六合人

四百峯頭袖裏風羅浮疑在半天中小坡作伴和  
詩苦春睡何如飽飯同前度是非今却是後來公  
論本還公不慙我爲翻詩案留得聲光隔海通  
瓊臺步武仰高風多少兒孫禮度中著述不嫌天  
地老姓名直與古今同一生鼓鑄應憐我幾度羹  
墻得見公昭代式崇新廟貌休光先傍九霄通

寓瓊臺

明鍾芳

寒燠深冬始覺均海天風候異常倫客緣幽暇頻

瓊山縣志

卷二十六

藝文

詩

四十五

留醉天爲退荒倍借春潮落魚龍歸舊窟雨餘花  
柳試新痕長安北望爭何許紅日光芒麗五雲

珠崖雜興

鍾芳

抱郭名峯面面竒海風吹水碧參差千村並育方  
隅靜四季長春草木知地盡波濤分造化俗殊言  
語雜侏儻釣鼈誰似唐遷客同賦登高望闕詩  
汗漫波濤限一州濃冬天氣似深秋島雲盡掃月  
平檻羌笛一吹風滿樓山下小園收吉貝屋邊深  
樹叫軻駟青青草木經年秀剛觸愁人早白頭

顏盧崗

明史朝宜

棟宇春深到古盧暖風晴日集靈都野花作意當

筵落山鳥迎人隔岸呼綠暗煙蘿低蓋入丹懸嶺  
樹緩車驅探幽兼得高賢宅羅密根前坐夕晡

環瓊海色

明郡守程瑩

巨浸空中一島清四圍海色透南溟風生浪湧千  
山雪潮落沙明萬戶星蜃氣晴嘘村霧濕龍涎夜  
吐水雲腥凭高正見鱗旗動煙外來帆有貢舲

雁塔薰風

明鄭廷鵠

山蘿高捲石橋瀆紫塔幢幢拂五雲雁影昔年還  
北渚龍吟此日動南薰歌鐘清徹流風轉舞扇瞻  
迴落日曛衣錦題名思往事杏花亭上正氤氳

海門秋月

鄭廷鵠

瓊山縣志

卷二十八

藝文

詩

三

秋嶼潮生月正懸天高海濶夜娟娟龍沙萬里蟾  
光動珠浦三更蚌影圓風捲浪花驚宿鶴水鳴霜  
葉觸啼鵲真遊那得乘槎夢直泛銀河學閬仙

七星寒秀

鄭廷鵠

天外芙蓉曉嶂開七峯蒼翠擁仙臺紫垣珠斗空  
中落白馬瑤圖海上來雲歛高秋迴五嶺月明清  
夜近三台心懸北極堯天迴何羨東封博漢才

陶公福地

鄭廷鵠

五嶺迢迢擁福山陶公盤鬱海雲間寒潭夜雨蒼  
龍吼曲水春風彩鳳還竹逕石邊看獨塔草亭峯  
外送雙鬢仙臺不秘長生藥蒲節松花可駐顏

王龍泉

鄭廷鵠

玉龍迴首碧池前空谷泠泠啟大川石砌初通蘋  
藻雪錦題新挂蔦蘿煙仙源別是通秦島古峙何  
常問漢年要識山靈有神應商霖今日傳巖篇

文筆峯

明黃 蓋

柱石稜稜倚絳霄筆峯東控海門潮常濡雨露驚  
濤壯迅掃風雲淡墨嬌舞鳳似應秦玉管落蔦還  
擬漢銅標晴烟荏苒長安路猶接龍飛萬里橋

天威佑德

倭犯鍾司徒佳城雷  
迅遁去詩以紀之

明海 瑞

既歸三尺樂斯堂况有金函玉匣藏誰謂蓋棺占  
定事猶遺赫怒庇重岡丹心貫石塋俱古赤電明

瓊山縣志

卷二十八

藝文

詩

四

心山亦蒼千載智愚都幻化到來賢哲自洋洋

樂耕亭

為邱郊題

海 瑞

源頭活水溢平川桃色花香總自然海上疑成真  
世界人間誰信不神仙棋驚宿鳥搖深竹歌過行  
雲入九天良會莫教輕住別每隨流水惜芳年

學士莊讌集

明胡 榮

村田卜築喜初成北望紅雲繞帝京玉署文章多  
舊稿青山泉石有新盟開尊尚憶黃封酒欹枕如  
聞禁漏聲暇日偶逢林叟說瓊臺勝地即蓬瀛

五指山和邱文莊韻

明王宏誨

地盡南溟氣復連五峯如指勢擎天浴光應捧辰

池日染翠疑探太乙煙瑤島露分仙掌湛寶輪花  
傍佛支懸寰中維嶽紛羅立誰向鴻濛握化原

拜邱文莊公

景賢祠

王宏誨

烏衣巷口夕陽斜祠宇春深護碧紗庾嶺嗣興唐  
上相瓊臺應運魯東家名高翰苑推經濟書奏宸  
旒荷寵嘉鄉里衣冠今不乏幾人名世樂勲華

明昌塔

王宏誨

春深乘興此登臺奇甸風煙四望迴五指雲山皆  
北向七星芒曜自東來天邊渺渺龍樓迴海上冥  
冥蜃閣開千載明昌逢泰運佇看南極會中台

春日同許給諫諸文學登明昌塔絕頂

作海忠介詩者誤

瓊山縣志

卷二十八

藝文

詩

四十五

王宏誨

縹緲丹梯此共登側身雲壑擬飛騰天連滄海懸  
孤嶼人立青霄最上層望氣幾年逢尹喜傳衣何  
處是盧能摩空捧日屬吾黨雁塔龍門次第升  
讀海忠介平黎章

王宏誨

九死批鱗歷險艱一生砥柱障廻瀾孤忠耿耿雲  
霄上正氣堂堂宇宙間南海青天名尙在中臺冰  
月望猶寒茂陵他日求遺草黎議從誰策治安

海口渡

奉使南還

明許子偉

路斷天涯得少停樓船簫鼓日逢迎三更挂席渺  
滄海二月乘槎老使星春氣暖如帷下卧潮聲細

入寢邊聽寒裝頓喜充行篋依舊懸車菽水亭

檳榔

國朝郡守牛天宿

密葉重重鎖翠旻離離百子節中勻一盃可釋三生怨數顆能堅百歲嫵登頰紅潮增斌媚潤脾津液益精神海航價重琅玕玉信作瓊南第一珍

美人蕉

牛天宿

翠剪荷衣花作容豔姿不與衆芳同迎風嫋嫋纖腰軟映日盈盈笑臉紅雨過香浮雕檻外月來影弄曲欄中等閑移向書窗下何異明妃在漢宮

荔枝

牛天宿

綠樹枝頭綴絳囊花開常帶洞庭霜色如瑪瑙無

瓊山縣志

卷二十八

藝文

詩

四六

瓊玷味似醍醐有異香清入心脾詩思爽甘沾唇齒酒觴涼東坡自願常為客何怪紅塵驛路忙

題瓊州

步邱文址五指山韻

國朝張世燾

狂瀾屹起萬峯連小洞天還大洞天五指直披雲有路七星高映水無煙海濱東魯垂聲久奇甸南溟特旨懸川嶽靈鍾應靡盡詎將邱海擅茲原

拜忠介祠

張世燾

瞻仰祠前百拜連居然身入玉壺天一輪烈日明秋水千古霜風洗暮煙世事江河流漸下生民塗炭命如懸只今聖主需良弼安得先生作九原

浮粟泉

國朝總鎮范時捷襄平人

何處靈源通海嶼乾坤未鑿混雙清一經逐客開  
生面遂使遊人足勝情龍噴玉漿浮雪色鳥銜金  
粟幻泉聲不妨日酌宜吾性嘯吸天真濯月明

景賢祠

國朝府同知姚哲  
湖廣黃陂人

節義文章舊典型賜祠同此祀忠貞一時流逐非  
公論千載賢奸有定評弔古獨深唐宋恨招魂難  
盡楚湘情只今蘋藻馨香處天海孤懸絕代名

景賢祠

國朝瓊山令王贊  
直隸新安人

兩朝難把數公留竒劫天教海外遊遺老非因鉤  
黨至功臣偏惹謗書酬鄉思好借同堂慰客路何  
堪萬里投獨喜文莊稱地主文莊瓊山人幼時讀書祠內後先

瓊山縣志 卷二十八

藝文 詩 四七

俎豆並千秋

羣賢落落歎無儔今喜蒸嘗祀並優數百年來人  
盡往二千石至蹟還留祀廢太守賈公重葺合祀盈堦披拂清  
風蠶滿座續紛化雨稠余亦頑廉屬後起却慙俗

吏對名流

蘇亭蘸翠

國朝陳咸

丙翰已成春夢事置公丘壑正相安鐘聲初起泉  
聲亂僧影遲歸月影殘五指練垂窺牖靜七星劍  
挂屋梁寒當年南徙無官舍今日樓臺却壯觀

紅潮登頰醉檳榔

國朝瓊山教諭關必登

瓊州異味絕中華閒嚼山檳勝雪芽露灑金莖含

杏雨津流仙液洗桃花腰肢舞態嬌無力齒頰紅  
侵玉有瑕一醉天然描不出却嫌脂粉尙頻加

碧溪新漲

國朝楊纘烈大埔人

門臨百折一流明漱澗春潮次第生驟雨驚濤初  
赴壑輕風細縠總環城汀來白鷺當軒立艇倚青  
莎隔岸橫爲向靈源探活水濫觴五指海天擎

綠野香荷

楊纘烈

秀野晴明百卉肥清風攜得異香歸祇應把臂追  
君子便與開樽酌少微雨送殘春翻翠蓋煙濃首  
夏綻紅衣爭妍出水鞭先着莫待秋來怨夕暉

亭前皓月

楊纘烈

瓊山縣志

卷二十八

藝文

詩

四

洞酌亭前漣乳鮮清輝蕭爽月輪圓一泓水色浮  
金粟千載秋光護玉泉桂散花風飄古井珠傾葉  
露灑平田椰陰石上斜斜影孤鶴長空淚海天

檻外寒秋

楊纘烈

凭欄彌望一陽通海甸清曠接遠空歲晏人霑菒  
葉雨臘前秧插杏花風千畦水戽黃泥岸兩部蛙  
喧綠草叢點綴殘冬生意好陌頭還見佛桑紅

初陽塔影

楊纘烈

海日曛曛若木低塔光突兀過亭西影干曉露凌  
雲筆尖拂晨星取月梯漫擬金莖仙掌動應同玉  
筍佛名齊文峯拔地千尋起夜半聞聲好舞雞

百雉霞光

楊纘烈

瀟灑女牆傍水涯烟浮萬棟映晴霞朝曦曠宕通  
城錦晚照輕明滿縣花迢遞柝聲傳戍閣參差樹  
色芾官衙遙臨粉堞閒敲句細雨新秋日正斜

綠野香荷

澄邁 教諭周炳  
東莞 人

邂逅清和翠蓋張連郊帶畝散幽芳方塘永日皆  
擎綠四野聞風不辨香得得潛親君子氣悠悠遙  
挹大夫裳佳名竊取聯文社未許唐人擬六郎

瓊臺覽古

國朝學政吳鴻

橫海樓船出漢家南荒一髮啟朱耶地穿絕島圍  
龍窟山壓羣黎樹虎牙廳母有風飛鐵浪天孫無

瓊山縣志

卷二十八

藝文

詩

四九

路接銀槎名香十斛氤氳集吹遍瓊臺四季花  
瘴雲迴合鳥飛窮直北長安一望中箕尾星懸沈  
夜氣枕椰葉老颭秋風一時春夢憐村媪千古孤  
寒泣令公此地由來遷客藪不堪哀怨楚湘同  
邱海大名齊海甸祠鄰玉局奉蒸嘗著書自裕經  
綸業憂國還成哭泣章零落諸孫南巷阮驂驪異  
代曲江張十三州邑鍾靈地後起何人振夕芳

渡海

國朝庶吉士 饒慶捷  
大埔 人

新流初長報鼉更高桂蒲帆趨曉晴萬里波平天  
一色三秋氣爽鶴千聲連雲遠樹微堪辨八耳風  
濤了不驚觀海觀瀾從此始應誇奇絕到蓬瀛





瘴海于秋風月在蛾眉逃歸仙佛原無主交舍符  
黎欲倚誰自古才人多被謗精誠惟有後宮知  
讀瓊臺詩話懷清湘蔣文定先生二符家麟

文莊自少早能詩五指參天句特奇既有嘉猷臣  
帝治且將餘緒作師資鳳凰文彩誰堪許鸚鵡聰  
明世共知如向大庖嘗一臠箇中珍珠已潛滋

公才公望正無窮小宋名誇大宋同千古趙家稱  
夏日三年京國坐春風廟堂衣鉢情深託師友淵  
源脈自通仰止高山猶不遠問途恨隔粵西東

瓊臺懷古六首 選四

國朝 王承烈

據鞍誰建漢家功苦戰曾稱矍鑠翁拓地籌邊山

瓊山縣志 卷二十八

藝文 詩 五十一

聚米擎天畫界柱標銅戶歸馬革情何壯力厭蠻  
氛氣益雄最恨奇冤成慧苒不堪惆悵弔孤忠馬伏

犀渠錦傘獨南征嶺表妖氛次第平漫道吳宮曾  
教戰須知譙國亦能兵新嘗險阻經三世屢策功  
勲表寸誠欲問荒祠何處是惟從青史仰威名譙國

夫

五指峯高接上台靈鍾秀毓濟時才文章自古推  
班馬著述於今見賈枚出納中樞熙庶績平章大  
政樹鴻裁滄溟地脈何曾斷文字全將氣運開邱文

莊

補天誰識寸心丹。九死孤臣萬慮攢。自是松筠同勁節。由來鐵石即忠肝。千秋烈日輝霜簡。一代香風。藜露檀正氣堂堂。標骨鯁中流砥柱。障迴瀾海忠

介

文筆峯

國朝符顯銘

天教海外闢文明。百尺名峯拜管城。插漢朝書烟色淡。當空夜點露華清。春回爛熳花初放。秋入蒼茫老更橫。我欲披圖看筆陣。白雲何處覓先生。

靈山疊翠

國朝曾日躋

山山濃綠山圍屏。山得靈神地亦靈。天送雲烟堆積翠。地生花草透深青。岡巒起伏人難認。空色迷

瓊山縣志

卷二十八

藝文

詩

五

離路莫經渲染清。溪疑潑墨藍光四出映瓏玲。

補白沙口哀詩有序

明唐 胄

嗚呼趙與塔死後三閱月而宋亡矣。自阿里海涯戍鄂以來數年之間。荆南江廣望風迎降。聞有如高世傑李芾馬瑩之苦節。拒敵亦不過斬首自盡而已。豈有若此裂殺之慘哉。且當是時。西來迎刃之大軍。隔海矣。同心之應科已死矣。宋之土宇垂盡矣。豈不知大勢之去。螳臂之不可禦。然所以必謾罵以泄其憤。堅守以固其節者。心焉而已。宋室守臣死節雖多。豈有後於趙與塔者哉。然以遠士孤臣。史氏不為立傳。續綱

目者不爲大書可惜也夫雖然此猶食祿也若  
謝明謝富冉安國王之傑輩郡士爾服死已難  
而又甘招剖磔尤何烈也然或知義者至於瓊  
民當海中之再稱制則首起以應之厓波忠魂  
不知幾許欽廉高化糧積既爲史格所運獨盡  
室傾困以濟甯浩漾而不辭馬旺旣主其郡猶  
篤一心日致數警檣旗報仆帝屍久浮黃威速  
等尙未甘心詔置極刑而不悔卒之海陵潰散  
臣卒數千皆不他適特嚮念而遠依焉其精誠  
意氣之感召又何如哉噫瓊去中原萬里朝廷  
政澤之霑獨遲及國之亡也人心固結獨後於  
天下豈三百年惠養之所致歟抑張趙二使君  
當母之義氣所激與或人情土俗之美而自不  
能已歟故論宋三百年之天下其先人心之歸  
也始於陳橋其後人心之不忘也終於瓊海所  
謂後死之睚將不帝秦之齊士閉城之魯民皆  
兼而有之矣孰謂南荒之外而有此地也哉桐  
鄉外紀有哀使君義士詩而不及民茲特彊裁  
以補云

哀使君

明王佐

末路誰當國步艱瓊州節概重常山心懸北極天  
應遠血洒南荒地盡斑上帝亦哀麟鳳死中原長

照尾箕寒使君忠義言難盡只把哀詞滴淚彈

哀四義士

王佐

五更風雨晦乾坤守信雞鳴自不昏萬戶千門皆已死汗青今見四人存

哀百姓

明唐 胄

輿圖二百盡皇州宋室遺民尙有不松栢誰捫共客腹絃歌未散魯公頭忠魂幾許隨波恨孤旅三千特地投那道深仁炎趙錄無端氣脈向茲收

七絕

望闕亭

古蹟在張吳郡顏村宰相李德裕貶時建唐改顏城縣爲崖州即今之張吳郡顏村非今崖州也今崖州自宋始有

唐李德裕

瓊山縣志 卷二十八

藝文

詩

五古

獨上高樓望帝京鳥飛猶用半年程江山只恐人歸去百匝千迴遶郡城

天寧寺閣題花 三首

宋李綱

深院無人簾幙垂玉英翠羽粲芳枝世間顏色難相似暗雪初殘未壓時

冰玉風姿照坐寒炎荒相遇且相寬紵衣縞帶平生志正念幽人尙素冠

阻涉鯨波寇盜深中原回首涕成霖清愁萬斛無消處賴有幽花慰客心

馬鞍山

宋胡銓

青山不斷錯峯巒雲跨驂騮天際間此語一經詩

客道。至今人指馬鞍山。

曲肱 三首

宋白玉蟾

昔在清華第一宮。祇緣醉後怒騎龍。傾翻半滴金瓶水。不覺人間雨發洪。

瑶池王母宴羣仙。兩部笙歌簇綺筵。誤取一枚仙李喫。又來世上不知年。

不把雙眸看俗人。五湖四海一空身。洞天深處無人到。溪上桃花度幾春。

瓊山出郭

元范惇

自出瓊州石郭門。更無平行似中原。重重葉暗桃榔雨。知是黎人第幾村。

瓊山縣志 卷二十八

藝文

詩

五十五

檳榔寨

范惇

秋入黎山風雨多。長江不定駐驚波。翠榕葉底聞鸚鵡。自此無如客思何。

馬鞍岡

明董其昌

鞭石何年自海東。平岡一踴類行空。標形笑取山為馬。不入驪黃牝牡中。

海南風景

明方向

海外風光別一家。四時楊柳四時花。寒來暑往無人會。只看桃符紙歲華。

雜詠

方向

箭竹芭蕉亂結村。人家猶有古風存。相逢盡道年

來好不見催種夜扣門

天妃廟

明侍 楊 稽

秉心玉潔與冰清 黜陟貪婪佐聖明 若載苞苴并土物 任教沉在此滄溟

前題

明副 項 忠

范滂攬轡志澄清 愧我無才贊治平 但使此心堅似鐵 何須立誓對滄溟

相府咏梅

明檢 陳 縝

時羣公讌集邱師邸中皆翰苑名流予以一明經濫厠席末劉希賢公健指梅起韻謝公遷王公鰲次之二公邱師門士也予既不辭鄙俚蒙

瓊山縣志 卷二十八

藝文

詩

五十六

羣公擊節獎賞至稱為吾輩畏友翼蚤各投片刺枉車騎泊予在木天而羣公亦相繼登樞軸一見如舊自惟予此作初特以免酒不謂遂當一贊成締合而先輩之虛懷雅量亦寥寥千載也姑附之以志感云

東風昨夜到天涯 玉種移來宰相家 不是此心堅似鐵 雪霜枝上敢開花

乙岳真人

為庠仙周思仁題

明廣東 巡撫 談 愷

乙岳山人海上仙 能使三五覓先天 知余原是烟霞侶 親授猶龍第一篇

颶風

國朝 牛天宿

怪雲蔽日海天龍。萬彙難禁一夜風。堪歎郊原堆白骨。姓名猶隸版圖中。

萬竈吹烟列海隅。方期恒產百年居。無端一夜洪濤發。半作哀鴻半化魚。

瓊山縣志卷之二十八終

瓊山縣志 卷二十八

藝文八

詩 五七

